

# Dunnas cun profil, temperament, qualitads e contacts

Successiun a la testa da la Lia Rumantscha

DA CLAUDIA CADRUVI / ANR

■ **I dat ellas – las dunnas che fissan capablas da manar la Lia rumantscha. L'ANR preschenta ina schelta da personalitads dal mund politic, cultural e medial.** Dapi prest 100 onns exista la Lia Rumantscha. A la testa èn stads fin uss adina umens: nov presidents e diesch secretaris. Ils 27 d'october elegia la radunanza da delegads da la Lia in successur per il president *Vincent Augustin*. L'ANR preschenta indesch dunnas cun profil, temperament, qualificaziuns ed experiensas che possedan bunas raits da contacts per timunar la pli gronda organisaziun dals Rumantschs.

## Trais deputadas

Per il presidi da la Lia Rumantscha èsi impurtant d'avair buns contacts cun il mund politic u anc meglier d'esser gist sez en la politica (guarda fanestra). En il cussegl grond hai var diesch deputadas che discurren rumantsch. Tranter quellas crodan si trais dunnas sco candidatas potenzialas.

*Leta Steck* (1968) politisescha en la pld ed è dissegnada da construcziun auta cun in agen biro da planisaziun. Plirs onns è ella stada derschadra districtuala. Dapi l'entschatta da quest onn sesa ella en la suprastanza communal da Tschlin. Ella è vicepresidente



**Leta Steck**

dal Center da sanadad Engiadina Bassa en il cussegl d'administraziun da l'Institut autalpin a Ftan.

*Silvia Casutt* (1958) è commerzianta, politisescha en la pcd ed è stada 12 onns presidenta communal da Falera. Sin champ nazional è ella vicepresidente da l'Associaziun da las vischnancas svizras. En la Regiun Surselva s'occupa ella dal ressort da l'economia regionala. Tar Flims, Laax, Falera management SA è Casutt vicepresidente.



**Silvia Casutt**

*Annemarie Perl* (1961) è dunna da fatschenta e trenadra da wellness. Dapi l'entschatta da quest onn è ella vicepresidente dal circol Engiadin'Ota. La politica da la pld ha presidià la cumissiun da gestiun dal cussegl grond durant la discussiun davart l'affera enturn la resgia Mayr-Melnhof. Perl ha divers mandats, per exempel tar l'Academia Engiadina SA u tar l'Ufficina a Samedan.

## Duas presidentas regionalas

Da preschent timunan duas dunnas duas uniuns affiliadas da la Lia. Ellas possedan experiensa e contacts tar la basa, tge che munta medemamain ina impurtanta qualificaziun.

*Maria Sedlacek* (1950) presidescha dapi tschintg onns l'Uniun dals Grischs. Ella ha fatg ina scolaziun da commerzi e da laboranta da medischna. Plirs onns ha ella ademplì incaricas politicas sin champ communal e cirquital. Durant sis onns ha ella timunà il circol da Sut Tasna sco mastrala.

*Annalisa Cathomas* (1975) presidescha la Surselva Romontscha dapi quatter onns – dapi in onn en co-presidi cun Rino Darms. Ella ha studegià germanistica e romanistica ed è magistra gimnasiala. Da preschent lavura ella sco co-manadra per ils novs meds d'instrucziun per la scola rumantscha e per il plan d'instrucziun 21.

## Quatter dunnas da la



**Esther Krättli**

## cultura e scola

Era en il sectur cultural, en las scolas u en las medias datti persunas ch'enconuschan bain il mund rumantsch e che possedan grondas raits da contacts – in'impurtanta premissa per manar il dialog e timunar l'uniun tetgala.

*Esther Krättli* (1967) è docenta a la Scol'auta da pedagogia e moderescha l'emissiun «il tavulin litterar». Ella ha studegià lingua e litteratura taliana e rumantscha. Ensem cun *Renzo Caduff* procura Krättli la redacziun da las Annalas. Sco commembra da la cumissiun da cultura e sco presidenta da la cumissiun per lavur culturala professiunala enconuscha ella la scena d'artists e posseda contacts en l'administraziun chantunala.

*Petra Uffer* (1967) ha fatg il seminari da scolasts a Cuira e dat scola dapi varga ventg onns. Il mars ha ella terminà il studi supplementar da pedagogia curativa a Turitg. Ella presidescha la conferenza da magisters dal Grischun central.

*Annetta Ganzoni* (1958) lavura dapi 15 onns en l'Archiv svizzer da litteratura a Berna. Là è ella responsabla per la collecziun rumantscha e taliana. Ella ha studegià romanistica e quest onn cumpara sia dissertaziun «Las nuschnas sun glüms / da blava aspettativa» davart la lirica dad Andri Peer.

*Anita Simeon* (1972) è co-possessura d'in biro d'architectura e schefredacziun dad «Ideales Heim» ed «Atri-

um». Ella ha studegià architectura a l'ETH a Turitg. Durant 15 onns è Simeon s'engaschada en il comité per ils Dis da litteratura a Domat. Ella fa part da la cumissiun editoriale da la Chasa editura rumantscha.

## Duas giuvnas

Persunas giuvnas cun schlantsch e curaschi pon dar novs impuls ad ina organisaziun veglia e procurar per vent frestg.

*Barbla Etter* (1978) lavura da preschent sco assistenta a l'università da Friburg, nua ch'ella fa sia dissertaziun davart fusiuns da vischnancas en il Grischun e lur influenza sin la lingua e la cultura. Etter ha studegià romanistica e scienza da plurilinguitad ed ha lavurà tschintg onns tar la Lia Rumantscha. Ella presidescha la Corporaziun academica Rezia veterana.

*Chatrina Josty* (1984) studegia da preschent a la Scol'auta da pedagogia. Suenter sia matura bilingua aveva ella gia studegià linguas a Friburg ed ha lura lavurà sco redacziun tar il Radio Rumantsch. Ella ha presidià quatter onns la Giuru e trais onns l'Uniun per litteratura rumantscha.

## Presidents e secretaris dapi 1919

En ses cudesch «Rätoromanische Sprachbewegung – Die Geschichte der Lia Rumantscha» enumerescha l'autur Gion Lechmann tut ils presidents e secretaris che han timunà l'organisaziun tetgala.

Ils presidents: Giachen Conrad, Steafan Loringett, Andrea Bezzola, Pierin Ratti, Romedi Arquint, Toni Cantieni, Chasper Pult, Jost Falett e dapi il 2004 Vincent Augustin.

Ils secretaris: Steafan Loringett, Andrea Schorta, Jon Pult, Giachen Giusep Casaulta, Hendri Spescha, Iso Camartin, Hans Caprez (elegì e sa retratg avant entrar en uffizi), Bernard Cathomas, Gion Antoni Derungs e da preschent Urs Cadruvi.

## «Pel dira» e betg dumbrar uras

La fin dal 2012 remetta Vincent Augustin ses uffizi sco president da la Lia Rumantscha. Il temp d'uffizi è limità sin nov onns. L'ANR ha dumandà il parsura, tge che ses successur u sia successura dovria per ademplir la funcziun.

«I dovra pel dira», di Augustin. «Ma en emprima lingia ston ins avair entusiassem per il rumantsch.» Necessari saja era ina gronda purziun pazienza cun ils Rumantschs. Ins dovria contacts cun la scena politica e sche pussaivel duess ins gist sez esser en la politica.

E quant temp ston ins quintar per la lavur da presidi? „Ins na dastega betg ponderar, quant temp ch'ins impunda. Tgi ch'è memia fitg contabilist, n'è betg la dretga persuna per quest post“, di Augustin. Gist dacurt saja el vegnì critigà perquai ch'el saja stà preschent mo

parzialmain e durant intginas uras ad ina dieta scientifica che haja cuzzà dus dis.

Il presidi vegnia indemnissà cun ina pauschala annuala e cun spensas. «Jau hai surpiglià la pauschala da mes antecessur Jost Falett», di Augustin. «A las spensas hai jau adina renunzià – sco contribuziun da spargn persunala.»

E da tge regiun sto il proxim parsura vegnir? «L'emprim èsi da guardar sin la qualificaziun d'ina persuna e betg sin il saun regional.» Impurtant saja ch'il president lavuria ensem bain cun l'operativa.

In ulteriur punct che Augustin menziunescha: «Il futur president u la futura presidenta na duess betg esser memia vegl ed en mintga cas in zichel pli giuven ch'il president che va en pensiun.»